

Gvej Haeux

割稻谷

Gveigangj Si Cinzdangz Gih Mungzgungh Cin Gauhcan Siujyoz sam (2) ban Lij Yijdungz

贵港市覃塘区蒙公镇高占小学三(2)班 李雨彤

Ngoenz singhgiz roek, daxmeh daiq gou bae ndaw doenghnaz gvej haeux.

Gou simvueng mbeilau dwk daeuj daengz ndaw nazhaeux, aenvih gou gig lau duznong iq, ndigah seiz mbouj seiz aeu bae fuengzre gij non raih gwnz din gou daeuj. Daxmeh raen gou mbouj onjsim guhhong, lau gou gaem liemz gvej sieng fwngz, couh cat din fwngz gou rim funghyouzcingh liux, yienghneix, duznong couh mbouj gamj daeuj raih gou lo, ndaek rinhang caemgywg ndaw sim gou cix cuengq roengzdaej lo. Daxmeh son gou: "Gaem fagliemz seiz, aeu gaem daengz giz swheij ceiq cwxcailh bae. Gvej gohaeux seiz, sien aeu byailiemz dawz gohaeux ngaue hwnjdaej, doengzseiz yungh fwngzswix gaem maenh donhgwnz gohaeux, youz baihlaj coh baihgwnz yungh di rengz baez gvej, yienghneix couh mbouj yungzheih gvej deng fwngz lo, hix engqgya mbaetrenz lo." Daxmeh itmienh gangj itmienh guh yiengh hawj gou yawj.

Gou sijsaeq dauqun gij fuengfap gvej haeux daxmeh gangj haenx, gungj hwet roengzdaej, fwngzswix gaem maenh haeuxfiengz, fwngzgvaz gaem ndaet fagliemz, hag bae haujlai nanz cij gvej ndaej song go haeux, gohaeux gvej goenq lo, hoeng caekhaex gou cix "boeb" naengh gwnz diegnaz lo. Gou sup gaemz heiq ndeu, laebdaeb gvej yaep ndeu, youh dawz gohaeux gvej goenq haenx cuengq ndei, "haj go couh byoz, haj go couh byoz", gou youq ndaw sim menhmenh geq dwk. Mehbaj bohlungz byaij gvaq cungj haenx gou naengzganq, gou yienznaeuz miz di baeg, hoeng

ndaw sim cix diemzsisi. Gou yied gvej yied vaiq lo.

Gvej ngoenz haeux ndeu le, gou cix caencingq rox daengz: "Ndaem haeux nditndat dak, hanh yag roengz namh lai, byawz rox haeux gwnz daiz, naednaed daiq sinhoj." Gou hix gamjsouh ndaej daengz gij sinhoj gyoengq nungzminz mehbaj bohlungz. Gyoengqde sinhoj guhhong bi doek bi, dwg vih hawj raeuz ndaej gwn ngaiz hausaksak ndaw vanj gwnz daiz, raeuz aeu engqgya insik haeuxgwn, insik gij lwedhanh dwgrengz gyoengqde.

(lauxsae sonyinx: Cinz Cozli/指导老师:覃作利)



▲ Bousij Lij Yijdungz youq ndaw naz gvej haeux. (Cinz Cozli ingi)

Gienh Saeh Nanzlumz Ndeu

难忘的一件事

Gveigangj Si Cinzdangz Gih Mungzgungh Cin Lingzsw Siujyoz seiq (2) ban Cinz Meijyangz

贵港市覃塘区蒙公镇凌寺小学四(2)班 覃美洋

Daj gou oksei q daengz ngoenzneix, nyangz gvaq haujlai saeh, youq gij saeh haenx ndawde miz gienh ndeu hawj gou gig nanzlumz.

Mwh gou ndaej caet bi bihaenx, miz ngoenz ndeu, aenvih gou caeuq daxmeh dingj bak, ndigah daxmeh couh fad gou ndaw cib ngoenz mbouj ndaej gwn saejdaez. Gou ngoenz he mbouj gwn saejdaez couh gig nanzsauh. Daxmeh simdoeg lai lo!

Miz ngoenz ndeu, gou nyaenx mbouj ndaej caeg gwn di saejdaez, gwn sat le ndaw sim gig lau, lauhei q deng daxmeh moeb. Doeklaeng fwt siengj, dawz gij baucang saejdaez yo hwnjdaej, mbouj hawj daxmeh yawjraen, yienghneix gou couh mbouj deng daxmeh ndaq lo. Gou lij cai q dem di saejdaez hwnjbae. Seizde ndaw sim gou lij daehei q vauvau bw.

Banhaemh bet diemj lai cung, daxmeh roengzban dauqma, hai bingsieng okdaej baez yawj, raen saejdaez noix lo, sikhaek hozndat fwgfwg dwk naeuz: "Mwngz dwg mbouj dwg youh caeg saejdaez gwn la?" Gou cang baenz yiengh gig ienuengj naeuz: "Mbouj...mbouj dwg gou." Daxmeh yawj gwnz diegnamh

mboujmiz daeh saejdaez, couh byaij deuz lo. Seizhaenx sim gou cij cuengq roengzdaej. Gyanghaemh, gou gienq daxmeh ninz caeux di, daxmeh dapwngq lo. Gvaq yaep he, gou yawjraen ndaw rug daxmeh gven daeng lo, couh daj ndaw gvihbuhvaq dawz gojdung okdaej. Mwh gou mbek baucang, daxmeh couh byaij haeujdaej. Gou yawjraen gij yiengh hujdengdeng daxmeh, couh daej hwnjdaej lo. Daxmeh byaij daengz henz ndang gou, bang gou uet raemxda. Ngeix mbouj daengz daxmeh cix mbouj ndaq gou, dauq unqswnh naeuz: "Mbouj hawj mwngz gwn saejdaez dwg lau mwngz heuj in, mwngz siengj danghnaeuz heuj mwngz in lo vaih lo, couh mbouj ndaej gwn gij ndeigwn daxmeh guh haenx lo." Dingq le gij vah daxmeh, gou ienqhoij raixcaix, sikhaek dawz saejdaez cuengq dauq ndaw bingsieng bae. Seizde daxmeh riu lo.

Yienznaeuz gienh saeh neix gvaq le haujlai bi, hoeng gou lij geiq ndaej gig maenh, aenvih gou itcig siengsaenq, daxmeh dwg boux vunz gwnz biengz ceiq gyaez gou haenx.

(lauxsae sonyinx:Lij Siujlij/指导老师:李小里)



▲ Bousij Vangz Yidungz hag saeg buhvaq. (Veiz Lanzmei ingj)

Gou Hag Rox Saeg Buhvaq Lo

我会洗衣服了

Gveigangj Si Cinzdangz Gih Mungzgungh Cin Gauhcan Siujyoz sam (1) ban Vangz Yidungz

贵港市覃塘区蒙公镇高占小学三(1)班 黄玉彤

Ngoenzneix, gou caeuq daxmeh bae reihbyaek, gou yawjraen daxmeh rwed raemx byaek gou hix angq dwk hag daxmeh rwed byaek. Doeklaeng, byaek rwed mbouj baenz, cix dawz buhvaq loengh dumz loengh uq lo. Daxmeh simgip naeuz: "Vaiq di baema vuenh buhvaq, mbouj ne, deng dwgliengz bw."

Gou ma daengz ranz, sikhaek vuenh buhvaq dumz roengzdaej, daxmeh lij caengz dauqma, gou sim siengj: Daxmeh moix ngoenz aeu guh hongrog, youh nyaengq hongranz, lij fugsah gou caeuq daegnuengx, geijlai sinhoj ha, danghnaeuz gou ndaej bang daxmeh guh di hong ndeu geijlai ndei ha! Yawj gij buhvaq dumz gou duet roengzdaej haenx, gou roxyinh miz hong guh lo, gou couh hag saeg buhvaq ba!

Gangj guh couh guh, gou hag gij yiengh daxmeh bingzciengz saeg buhvaq, ra faenjsaegbuh daej, dajhai suijlungzdouz, ciep buenz raemx ndeu, dawz buhvaq cimq ndaw raemx bae, caiq cuengq buenq beuzgeng faenjsaegbuh roengz raemx bae, aeu din caij geij baez. Miz haujlai raemxbop lo. Gvaq yaep ndeu, gou aeu fwngz no giz uq buhvaq, hoeng, gij uq cungj saeg mbouj bae. Daxmeh dauqma raen le, son gou gaem gaiq cat daej cat, daxmeh son naeuz, sien dawz giz uq ra okdaej, bu bingz gwnz dieg, caiq ciuq itdingh fuengyiengq cat bae, lai cat geij baez couh ndaej seuq lo. Gou ciuq gij vah daxmeh bae saeg, roengzrenz cat ha cat. Gou youh saeg geij baez raemx, dauqdaej saeg seuq lo, hix mbouj miz fugfauz lo, gou couh faenj raemx okdaej, dawz buhvaq dak gwnz faexsauh bae. Daxmeh raen gou yienghneix nyinhcaen, riu lo.

Gou hag rox saeg buhvaq lo. Gou geijlai sim' angq ha! Baezlaeng gou ndaej bang daxmeh guh di hongranz lo.

(lauxsae sonyinx: Veiz Lanzmei/指导老师:韦兰妹)